

NEWSPAPER CLIPPING
PERDANA LEADERSHIP FOUNDATION

UTUSAN MALAYSIA

DATE: 14/6 / 2008

Isu minyak: Abdullah cabar pembangkang

PASIR MAS 13 Jun - Datuk Seri Abdullah Ahmad Badawi membidas pemimpin pembangkang yang mendakwa kononnya mampu menurunkan harga minyak dengan mudah ketika rakyat berasa tidak puas hati dengan kenaikan harga petrol dan diesel yang tidak dapat dielakkan.

Sehubungan itu, Perdana Menteri mencabar parti pembangkang menurunkan harga minyak di negeri-negeri yang mereka kuasai dan tidak sekadar terus berjanji.

"Masa pilihan raya dulu pun mereka janji macam-macam tapi sampai hari ini mereka tidak tunaikan. Kalau hendak ku-

rangkan harga minyak, berilah subsidi untuk kurangkan harga minyak di Selangor dan Perak dulu.

"Kalau tidak boleh buat itu, tidak payahlah kritik. Tapi kita tahu pembangkang sentiasa ada benda untuk mengkritik.

"Seribu satu alasan boleh diberi oleh pembangkang, mereka boleh kata apa saja yang mereka mahu," kata Abdullah kepada pemberita selepas melancarkan Pelan Peningkatan Pengeluaran Beras Negara di Kampung Bendang Perangkap, Bunut Susu di sini hari ini.

Ketika diminta mengulas mengenai petunjuk perasaan yang dianjurkan oleh

beberapa pertubuhan termasuk parti politik pembangkang di Kuala Lumpur hari ini, Perdana Menteri mengakui ia sememangnya sesuatu yang telah dijangkakan.

"Bila ada yang tidak puas hati, (tunjuk perasaan) menjadi kecenderungan mereka untuk melahirkan rasa tidak puas hati," katanya.

Bagaimanapun, tegas beliau, kerajaan tidak akan membiarkan rakyat menanggung beban kenaikan harga minyak tanpa pembelaan.

"Saya inginkan jelaskan bahawa pihak kerajaan akan terus berusaha mengu-

rangkan bebanan kenaikan harga minyak. Kita memahami dan menjangkakan ia akan menimbulkan kemarahan.

"Tetapi kita juga telah pun memikirkan apakah langkah yang perlu diambil... sebab itu saya umumkan satu demi satu langkah untuk meringankan beban kenaikan harga," tegas beliau.

Abdullah menjelaskan, pengumuman itu termasuk pemberian rebat tunai kepada pemilik kenderaan persendirian yang boleh dituntut di semua pejabat Pos mulai esok.

Beliau berharap pendekatan yang melegakan rakyat itu dapat berjalan dengan baik.